



REPUBLIKA E KOSOVËS
REPUBLIKA KOSOVA – REPUBLIC OF KOSOVO

GJYKATA E APELIT PRISHTINË

Numri i lëndës: 2021:245717
Datë: 28.06.2024
Numri i dokumentit: 05871549

CAP.nr.745/2024

GJYKATA E APELIT E KOSOVËS NË PRISHTINË, Kryetari i Gjykatës Valon Totaj, në çështjen përmbarimore të kreditores F.C., të cilën e përfaqëson i autorizuari av.H.K nga Prishtina, kundër debitorit SHSKUK - Qendra Klinike Universitare e Kosovës - QKUK, me seli në Prishtinë, për shkak të borxhit në emër të shpërblimit jubilar, duke vendosur lidhur me ankesën e kreditores të paraqitur kundër aktvendimit të Gjykatës Themelore në Prishtinë PPP.nr.1418/2021, të datës 05.01.2024, me datën 26.06.2024, mori këtë:

A K T V E N D I M

REFUZOHET si e pabazuar ankesa e kreditores F.C. nga Prishtina, ndërsa aktvendimi i Gjykatës Themelore në Prishtinë PPP.nr.1418/2021, i datës 05.01.2024, **VËRTETOHET**.

A r s y e t i m

Gjykata Themelore në Prishtinë, fillimisht me aktvendimin PPP.nr.892/20, të datës 20.10.2020, e ka aprovuar si të bazuar prapësimin e debitorit SHSKUK - Qendra Klinike Universitare e Kosovës - QKUK, dhe ka anuluar urdhrin përmbarimor P.nr.615/2020, të datës 10.07.2020, të përbaruesit H.H. Gjykata e Apelit e Kosovës, duke vendosur sipas ankesës së kreditores F.C., ka nxjerrë aktvendimin me të cilin e ka aprovuar si të themeltë të njëjtën, duke prishur aktvendimin e ankimuar të gjykatës së shkallës së parë, ashtu që çështjen e ka kthyer në rigjykim, në të njëjtën gjykatë.

Në rigjykim, si dhe duke vepruar sipas udhëzimeve të gjykatës së shkallës së dytë, Gjykata Themelore në Prishtinë, me aktvendimin e ankimuar PPP.nr.1418/2021, të datës

05.01.2024, e ka pranuar prapësimin e debitorit SHSKUK - Qendra Klinike Universitare e Kosovës - QKUK, me seli në Prishtinë dhe e ka shfuqizuar urdhrin përmbartimor P.nr.615/2020, të datës 10.07.2020, të lëshuar nga përmbartuesi privat H.H, me seli në Gillogoc, duke e përfunduar në tërësi çështjen përmbartimore.

Kundër këtij aktvendimi, në afatin ligjor, kreditorja përmes të autorizuarit të saj, ka paraqitur ankesë dhe atë për shkak të shkeljeve të dispozitave të procedurës, konstatimit të gabuar apo jo të plotë të gjendjes faktike dhe zbatimit të gabuar të së drejtës materiale, me propozim që të aprovet ankesa e kreditores si e bazuar, të anulohet aktvendimi PPP.nr.1418/2021, i datës 05.01.2024, ashtu që të lihet në fuqi urdhri përmbartues P.nr.615/2020, i datës 10.07.2020, apo të prishet aktvendimi në fjalë dhe lënda të kthehet në procedurë të sërishme në gjykatën e shkallës së parë, me çka t'i rekomandohet të njëjtës gjykatë që caktoj një ekspert financiar – aktuar për të specifikuar dhe llogaritur pagën e kreditores, duke detyruar debitorin që në emër të përpilimit të ankesës të paguaj shumën prej 208 euro.

Debitori nuk ka paraqitur përgjigje në ankesën e kreditores.

Gjykata e Apelit e Kosovës, i shqyrtoi shkresat e lëndës, aktvendimin e atakuar, pretendimet ankimore dhe pas vlerësimit të tyre në kuptim të dispozitës së nenit 208 dhe 194 të Ligjit për Procedurën Kontestimore (LPK), lidhur me nenin 17 të Ligjit për Procedurën Përmbartimore (LPP), gjeti se:

- ankesa e kreditores, **është e pabazuar.**

Nga shkresat e lëndës rrjedh se kreditorja me datë 10.07.2020, ka parashtruar propozim për lejimin e përmbartimit në bazë të titullit ekzekutiv, vendimit të Inspektoratit të Punës Nr. ..., të datës 26.05.2020, më gjerësisht si në propozimin për përmbartim. Përmbartuesi Privat H.H ka nxjerr urdhrin P.nr.615/2020, të datës 10.07.2020, me të cilin e ka lejuar propozimin për përmbartim. Kundër urdhrin mbi lejimin e përmbartimit debitori me datë 27.07.2020, ka paraqitur prapësim me të cilin ka kërkuar që të aprovet prapësimi i debitorit dhe urdhri P.nr.615/2020, i datës 10.07.2020, të anulohet, ashtu që propozimi për përmbartim të hedhet poshtë si i pa bazë. Kreditori me datë 05.08.2020, ka parashtruar përgjigje në prapësim.

Duke vendosur mbi prapësimin e debitorit, gjykata e shkallës së parë ka nxjerrë aktvendimin e ankimuar PPP.nr.1418/2021, të datës 05.01.2024, me të cilin e ka pranuar prapësimin e debitorit duke vendosur sikurse në dispozitiv të të njëjtit. Në arsyetim të aktvendimit të ankimuar, gjykata e shkallës së parë ka theksuar se dokumenti përmbartimor me të cilin është lejuar përmbartimi, respektivisht Vendimi i Inspektoratit të Punës Nr. ..., nuk ka tipare të përmbartueshmërisë dhe nuk është i përshtatshëm për përmbartim. Tutje ka shtuar se dokumenti në fjalë mbi të cilin është lejuar urdhri përmbartimor, si i tillë nuk përmban shumën e detyrimit të kërkuar për përmbushje, ashtu që i njëjti nuk e përmbush kushtin e përshtatshmërisë së dokumentit përmbartimor. Më tej ka theksuar se në kuadër të këtyre rrethanave përmbartuesi privat si organ i shkallës së parë ka pasur për obligim ligjor, që të vlerësojë nëse dokumenti përmbartues i plotëson kushtet ligjore dhe se a është i përshtatshëm për përmbartim. Andaj gjykata

e shkallës së parë ka konsideruar se në këtë çështje, nuk janë plotësuar kushtet ligjore për nxjerrjen e urdhrin përbarimor, nga përbaruesi privat për shkak të mungesës së elementit të shumës në kuptim të nenit 27 të LPP, andaj edhe vendosi që të aprovoj prapësimin e debitorit dhe të shfuqizojë urdhrin përbarimor si në dispozitiv të aktvendimit. Për mënyrën e vendosjes e njëjta i është referuar dispozitës së nenit 27, 43 dhe 73 të LPP.

Gjykata e Apelit vlerëson se gjykata e shkallës së parë, në bazë të provave të cilat i ka pasur në dispozicion në shkresat e lëndës, ka dhënë aktvendimin e saj të drejtë dhe të bazuar në dispozita konkrete ligjore, prandaj konkludimin e gjykatës së shkallës së parë, lidhur me këtë çështje e pranon edhe Gjykata e Apelit se Kosovës, duke vlerësuar po ashtu se aktvendimi i atakuar është i rregullt dhe i ligjshëm, për arsye se i njëjti nuk është përfshirë në shkelje thelbësore të dispozitave të procedurës kontestimore nga neni 182 paragrafi 2 pika b), g), j) k) dhe m) të LPK, dhe se drejtë janë zbatuar dispozitat ligjore, e të cilat shkaqe ankimore gjykata e shkallës së dytë i vlerëson edhe sipas detyrës zyrtare, në bazë të nenit 194 të LPK, prandaj, në situatën konkrete të gjitha pretendimet ankimore të kreditores, Gjykata e Apelit i konsideron të pabazuara dhe të paqëndrueshme, ngase nuk kanë bazë në prova konkrete.

Në rastin konkret pala debitore me prapësim i është referuar papërshtatshmërisë së dokumentit përbarimor, prandaj gjykata e shkallës së parë me të drejtë ka vendosur si në dispozitiv të aktvendimit të atakuar, ngase nga provat në shkresat e lëndës ka gjetur se dokumenti përbarimor nuk i plotëson kushtet ligjore për përbarim, konform dispozitave ligjore në fuqi. Sipas vlerësimit të Gjykatës së Apelit, në rastin konkret dokumenti përbarimor është i papërshtatshëm për përbarim edhe nga fakti se me nenin 27 paragrafi 1 të LPP, në mënyrë shprehimore është paraparë se *“dokumenti përbarimor është i përshatshëm për përbarim në qoftëse në të është treguar kreditori dhe debitori, si dhe objekti, mjetet, shuma dhe koha e përmbushjes së detyrimit”*. Në bazë të nenit të sipërcituar del se kushtet në fjalë duhet të plotësohen në mënyrë kumulative dhe se mungesa e vetëm njërit prej këtyre kushteve, e bënë dokumentin përkatës përbarimor të papërshtatshëm për përbarim. Me shiqim në shkresat e lëndës konstatohet se dokumenti përbarimor – vendimi administrativ i inspektoriatit të punës Nr. ..., i dates 26.05.2020, në dispozitiv të tij nuk e përmban shumën e përmbushjes së detyrimit monetar, e që nuk dihet se si do të ekzekutohet një vendim i tillë. Në këtë drejtim Gjykata e Apelit gjen se qëndrojnë pretendimet e prapësimin të debitorit në lidhje me papërshtatshmërinë e përbarueshmërisë së dokumentit përbarimor në formën dhe përmbajtjen e tij aktuale, andaj për Gjykatën e Apelit gjykata e shkallës së parë ka vendosur drejtë kur e ka aprovuar si të bazuar prapësimin e debitorit.

Gjykata e Apelit me rastin e vendosjes pati parasysh pretendimet e palës kreditore, mirëpo të njëjtat janë të paqëndrueshme dhe të pabazuara, për shkak se me shikim në shkresat e lëndës vërtetohet se me rastin e parashtrimit dhe lejimit të propozimit për përbarim i njëjti është lejuar në bazë të vendimit Nr. ..., të datës 26.05.2020, i cili nuk i ka plotësuar kushtet ligjore për tu konsideruar dokument i rregullt përbarimor.

Duke i vlerësuar të gjitha pretendimet ankimore, gjykata e shkallës së dytë ka vlerësuar se pala kreditore as gjatë procedurës e as me ankesë nuk ka propozuar plotësimin e propozimit

përmbartimor, andaj dhe gjykata e shkallës së parë sipas prapësimit të debitorit ka qenë e detyruar që të veprojë konform dispozitave ligjore dhe me të drejtë ka vendosur, pasi që ka qenë detyrim i vetë palës kreditore e cila ka interes në këtë procedurë, që paraprakisht të bëjë edhe precizimin dhe korigjimin e propozimit për përmbartim. Gjukata e Apelit vlerëson se pala kreditore eventualisht mund të parashtrijë propozim të ri në bazë të vendimit i cili i plotëson kushtet për tu konsideruar dokument i rregullt përmbartimor, pasi që në këtë procedurë ka bërë lëshime të cilat e kanë pamundësuar përmbartimin e propozuar.

Po ashtu, Gjukata e Apelit vlerëson se gjykata e shkallës së parë në çështjen konkrete juridike në mënyrë të plotë dhe të drejtë ka vërtetuar gjendjen faktike, e cila nuk vihet në dyshim me asnjë nga pretendimet ankimore. Prandaj për shkak të zbatimit të rregullt të procedurës dhe vërtetimit të tërësishëm dhe të rregullt të gjendjes faktike, drejtë janë zbatuar edhe dispozitat ligjore dhe gjykata e shkallës së parë për vlerësimin e vet ka dhënë arsye të mjaftuara dhe bindëse faktike dhe juridike mbi faktet relevante për të vendosur në këtë çështje juridike, të cilën në tërësi e aprovon edhe gjykata e shkallës së dytë.

Gjukata e Apelit me rastin e vendosjes i vlerësoi edhe të gjitha pretendimet e tjera ankimore, mirëpo të njëjtat nuk ishin me ndikim për një vendim ndryshe për çka edhe vendosi si në dispozitiv të këtij aktvendimi.

Kompetenca e Gjukatës së Apelit për të vendosur nga ana e gjyqtari individual në shkallë të dytë bazohet në dispozitën e nenit 3 par.2 të LPP, me të cilën është paraparë se *”në shkallën e dytë vendimet i nxjerr gjyqtari individual”*.

Nga arsyet e paraqitura me lartë, gjykata e shkallës së dytë vendosi si në dispozitiv të këtij aktvendimi në pajtim me nenin 209 pika (b) të LPK, e lidhur me nenin 17 të LPP.

GJYKATA E APELIT E KOSOVËS NË PRISHTINË
CAP.nr.745/2024, me datën 26.06.2024

Kryetari i Gjukatës
Valon Totaj